

Newspaper	Berita Harian
Date	25/6/2013

Ahli Parlimen BN tumpu usaha tunai aku janji

BH - 25/6/2013

» Kerajaan komited sedia pelan terbaik dalam Bajet 2014

Oleh Syuhada Choo Abdullah
choo@mediaprima.com.my

Kuala Lumpur

Ahli Parlimen Barisan Nasional (BN) akan menumpukan kepada usaha menunaikan aku janji parti ketika sidang Dewan Rakyat Ke-13 mulai esok, termasuk komited menyediakan pelan terbaik untuk rakyat dalam Bajet 2014.

Perdana Menteri Datuk Seri Najib Razak, berkata Bajet 2014 yang akan dibentangkan pada Oktober depan merangkumi beberapa aspek aku janji BN yang disuarakan pada Pilihan Raya Umum Ke-13 (PRU-13) lalu.

"Bantuan rakyat seperti BR1M (Bantuan Rakyat 1Malaysia) akan ditambah nilai, termasuk peruntukannya dengan melihat kedudukan kewangan kerajaan.

"Di samping itu, kerajaan menyasarkan menurunkan defisit negara dari empat peratus kepada 3.5 peratus pada 2014 dan seterusnya kepada tiga peratus pada 2015," katanya dalam blog peribadi beliau www.1Malaysia.com.my, semalam.

Najib berkata, perbincangan mengenai Bajet 2014 bermula minggu depan dan menjemput rakyat menyuarakan pandangan serta pendapat bernas berhubung pelan belanjawan.

"Kami komited untuk terus mendengar suara rakyat dan meletakkan kepentingan rakyat sebagai teras kukuh dalam rangka perbelanjaan tahunan

negara," katanya.

Dalam pada itu, Perdana Menteri yakin Ahli Parlimen yang diberi mandat oleh rakyat pada PRU-13, mampu berbasah secara berhemah dan tertib pada sidang kali ini.

Sumbang idea bernas

Beliau berkata, Ahli Parlimen perlu menyumbangkan idea serta pendapat bernas demi kepentingan rakyat dan menyertai secara aktif supaya perbincangan boleh dijalankan dengan berkesan dan bermanfaat.

Sambil mengucapkan tahniah kepada mereka, katanya sidang kali ini turut menyaksikan penyertaan lebih ramai Ahli Parlimen muda yang boleh membawa aspirasi dan semangat generasi muda yang membentuk lebih 40 peratus daripada jumlah pengundi berdaftar negara.

Beliau menyifatkan perkembangan itu sebagai sihat kerana generasi muda adalah penggerak sosio ekonomi negara dan tidak boleh sama sekali dipinggirkan dalam usaha membangunkan ibu pertiwi.

"Saya menyeru semua Ahli Parlimen sama-sama bekerja keras demi membangunkan negara yang kita cintai. Rakyat jelata bergantung harapan kepada kita semua," katanya.

Maklum balas rakyat

Najib berkata, Dewan Rakyat bertanggungjawab mencaj, membahar, merangka dan meluluskan rang undang-undang demi kepentingan bersama seluruh rakyat, dan Ahli Parlimen berperanan mengkaji pelan ekonomi, bajet kerajaan serta undang-undang sedia ada dan memperbaikinya, selain mendapat maklum balas rakyat dari kawasan Parlimen masing-masing.

Beliau juga berkata, Demokrasi Berperlembagaan yang diamalkan di negara ini se-



Najib mendahului upacara mengangkat sumpah sebagai Ahli Dewan Rakyat di hadapan Speaker Dewan Rakyat, Tan Sri Pandikar Amin Mulia di Parlimen, semalam.

(FOTO ABDULLAH YUSOF/BH)

“ Saya menyeru semua Ahli Parlimen sama-sama bekerja keras membangunkan negara yang kita cintai. Rakyat jelata bergantung harapan kepada kita semua”

Najib Razak,
Perdana Menteri

makin subur dan sihat, malah rakyat bertambah matang membuat pilihan serta menjaga dan mengamalkan prinsip demokrasi.

"Keputusan PRU-13 menjadi bukti amalan demokrasi begitu subur dan matang di negara ini. Bagi pihak diri saya dan kerajaan BN, perlu rasanya saya panjatkan rasa penghargaan kepada rakyat Malaysia yang telah memberi mandat kepada saya dan BN untuk terus mentadbir negara," katanya.